




PROCESVERBAL

Nga mbledhja e rregullt e Kuvendit Komunal të Rahovecit, e mbajtur më **31.7.2023** (e hënë), me fillim në orën **10:15**. Mbledhjen e kryesoi Kryesuesi i Kuvendit, **zt. Arbër Zenuni**. Në fillim konstatoi se ka kuorum për mbajtjen e mbledhjes.

Kryesuesi: Fillimisht, përshëndetje për të gjithë! I nderuar Kryetar i Komunës, **zt. Smajl Latifi**, Nënkryetar **zt. Fatmir Iska**, të nderuar anëtarë të Kuvendit Komunal, drejtorë të drejtorive komunale, zyrtarë, përfaqësues të KFOR-it, medie, të nderuar qytetarë të Komunës së Rahovecit, kjo është seanca e shpallur e **77 për këtë vit kalendarik**. Komiteti për Politikë dhe Financa, në mbledhjen e mbajtur më 18 korrik, për këtë seancë, ka përgatitur këtë:



REND DITE

1. Shqyrtimi dhe miratimi i procesverbalit nga mbledhja e kaluar;
2. Pyetjet dhe përgjigjet në pyetjet e kuvendarëve;
3. Shqyrtimi dhe miratimi i propozim-vendimit për dhënien në shfrytëzim afatshkurtër të pronave Komunale në Vrajakë;
4. Shqyrtimi dhe miratimi i propozim-vendimit për formimin e komisionit për zbatimin e procedurave të dhënies në shfrytëzim afatshkurtër të pronës së komunës në Vrajakë;
5. Shqyrtimi dhe miratimi i propozim-vendimit për dhënien në shfrytëzim afatshkurtër të pronave komunale në Xërxë;
6. Shqyrtimi dhe miratimi i propozim-vendimit për formimin e komisionit për zbatimin e procedurave të dhënies në shfrytëzim afatshkurtër të pronës së komunës në Xërxë;
7. Shqyrtimi dhe miratimi i propozim-vendimit për themelimin e komitetit konsultativ për persona me aftësi të kufizuara;
8. Shqyrtimi dhe miratimi i propozim-vendimit për miratimin e memorandumit të mirëkuptimit për mbulimin e pjesshëm të shpenzimeve të Strehimores "Shtëpia e Sigurt";
9. Shqyrtimi dhe miratimi i ndryshimit dhe i plotësimit të vendimit 01 Nr.408/22, i datës 28.12.2022, për ndryshimin dhe plotësimin e vendimit 01 Nr.263/22, i datës 25.1.2022 për themelimin e Komitetit për Politikë dhe Financa;
10. Shqyrtimi dhe miratimi i ndryshim-plotësimit të vendimit 01 Nr.265/22, i datës 25.1.2022, për themelimin e Këshillit Komunal për Siguri në Bashkësi (KKSB);
11. Shqyrtimi dhe miratimi i vendimit 01 Nr.326/22, i datës 31.5.2022, për përbërjen dhe organizimin e Komitetit për Shëndetësi dhe Përkujdesje Sociale;
12. Shqyrtimi i Raportit Financiar janar - qershor 2023;
13. Shqyrtimi i Raportit të ZKA-së, për vitin 2022;
14. Shqyrtimi i Raportit nga Drejtoria e Arsimit rreth përfundimit të vitit mësimor 2022/2023;
15. Shqyrtimi i Informatës nga Drejtoria e Bujqësisë, Pylltarisë dhe Zhvillimit Rural;
16. Shqyrtimi i Informatës nga Drejtoria për Shëndetësi dhe Përkujdesje Sociale;
17. Shqyrtimi i Informatës mbi realizimin e Planit për Mirëmbajtjen e Hapësirave të Hapura Publike në Komunën e Rahovecit;
18. Shqyrtimi i Informatës mbi realizimin e Planit të punës së Zyrës së Prokurimit, janar – qershor 2023;
19. Shqyrtimi i Raportit 6 mujor të Këshillit të fshatit Hoçë e Madhe.

Kryesuesi – Fillimisht hapësirën për një fjalë rasti e ka ish kryesuesi, zt. Defrim Kafexhiu.

Defrim Kafexhiu – Atëherë përshëndetje për të gjithë! I nderuar kryesues Arbër Zenuni, i nderuar kryetar, nënkryetar, drejtorë, anëtarë të kuvendit. Faleminderit për mundësinë e fjalës, desha ta uroj kuvendin për përzgjedhjen e kryesuesit të ri të kuvendit dhe t'i uroj suksese në zhvillimin e punës së kuvendit komunal të Rahovecit. Meqenëse u konfirmua vendimi i shkarkimit dhe përzgjedhjes së kryesuesit të ri të kuvendit komunal. Arbrit i uroj shumë suksese në udhëheqjen e kuvendit dhe besoj që është nder sikurse që ka qenë edhe për mua. Personalisht ju falënderoj të gjithëve për bashkëpunimin dhe gjithashtu ekzekutivin e komunës. Banorët e Komunës së Rahovecit i informoj që tani e tutje në cilësinë e anëtarit të kuvendit komunal do të rreshtohem nga radhët e opozitës dhe do t'i bashkohem atyre për opozitbërje, monitorim dhe dhënien e kritikave kundrejt ekzekutivit dhe kryetarit të komunës.

Lirigzon Kastrati – Faleminderit i nderuar kryesues, ekzekutiv, kolegë, përfaqësues të mediave, qytetarë. Desha të flas në lidhje me atë që, nëse e ka trajtuar komisioni kërkesën e profesorit Shkodran Imeraj lidhur me përkrahjen financiare për përkthimin e librit në gjuhën angleze “Masakra e forcave serbe në Pastasel të Rahovecit, 31 mars 1999” Këtë kërkesë pala e ka paraqitur me datë 26.06.2023. E falënderoj profesorin për mbledhjen e këtyre argumenteve dhe fakteve të krimit kundër njerëzimit që ka kryer pushteti serb dhe njëkohësisht i inkurajoj autorët tjerë të shkruajnë për çdo masakër që ka ndodhur në rajonin e komunës sonë.

Kryetari – Faleminderit i nderuar kryesues, Arbër Zenuni, nënkryetar, anëtarë të kuvendit, drejtor, përfaqësues të mediave. Jemi të informuar për angazhimin e profesorit Shkodran Imeraj dhe jam në dijeni që e ka bërë një kërkesë për përkrahje financiare për përkthim në gjuhën angleze, mirëpo këtë vit nuk mendoj që kemi mundësi ta mbështesim financiarisht sepse libri është promovuar vonë (para disa ditësh), gjithashtu edhe unë kam qenë i ftuar aty. Vitin e ardhshëm do t'i shohim mundësitë tona për subvencionim.

Kryesuesi – Atëherë nëse edhe dikush nuk ka ndonjë gjë për të shtuar, rendin e ditës si të tillë e vendosim në votim, kush është “për”?... Kundër?... Abstenim?... Me shumicë votash miratohet rendi i ditës për sot.

1. Shqyrtimi dhe miratimi i procesverbalit nga mbledhja e kaluar;

Kryesuesi – A ka dikush ndonjë vërejtje apo koment për procesverbalin e mbledhjes së kaluar, nëse jo e vendosim në votim, kush është “për”?... Kundër?... Abstenim?... Me shumicë votash aprovohet procesverbali i mbledhjes së kaluar.

2. Pyetjet dhe përgjigjet në pyetjet e kuvendarëve;

Hasan Përboqi – Faleminderit kryesues! Përshëndetje kryetar, kryesues, kolegë asambleistë, drejtorë, media. Më lejoni ta uroj kryesuesin e sapo zgjedhur. Uroj që kryesuesi i ri të punojë për të gjithë dhe kushtimisht po them që Kurani e Bibla për të, të jetë Rregullorja, Statuti dhe Ligji për vetëqeverisje lokale.

Rasim Fazliu – Faleminderit kryesues! Përshëndetje për juve, kryetarin e komunës, anëtarët e kuvendit, përfaqësuesit të LMT-së, OSBE-së, media. E kam një pyetje për drejtorin e Rinisë, Kulturës dhe Sportit: Janë ndarë pak mjete për rregullimin e sallës në Celinë dhe ku jemi me punime? Pyetja tjetër për drejtorin e Shërbimeve Publike dhe atë të Bujqësisë: Rrugët fushore në Celinë janë në gjendje shumë të keqe dhe mund të konstatoj lirisht që asnjë rrugë nuk është e përfunduar gati që 20 vite. Është mire që të paktën një rrugë të jetë e rregulluar mirë dhe më pas vazhdojmë sipas mundësive buxhetore që i kemi.

Edona Kryeyiu – Përshëndetje për të gjithë të pranishmit! Në emër timin personal i uroj shumë suksese kryesuesit. Dua të ndalem konkretisht për konkurset e vitit shkollor të klasëve të dhjeta 2023-2024. Duke i analizuar konkurset e shpallura nga DKA nga gjithsej 4 shkollat e mesme, në 3 prej tyre e kam bërë një analizë të vogël. Shkolla e Mesme e Lartë “Xhelal Hajda – Toni” – 6 paralele në shkenca natyrore dhe 2 në shkenca shoqërore. Shkolla e Mesme e Lartë “Ukshin Hoti” – 3 paralele në shkenca natyrore dhe 3 në shoqërore. Shkolla e Mesme e Lartë “12 Maji” – 3 paralele në shkenca natyrore dhe 3 të tjera në shoqërore. Pyetje për DKA-në është, pse edhe në shkollën “Xhelal Hajda” në Rahovec nuk praktikohet e njëjta politikë apo planifikim. Logjika e thotë shumë qartë: Në momentin kur një person me ndikim të madh e bën një kombinatori të tillë dhe kjo është duke ndodhur në vitet e fundit sa është Aleanca në pushtet. Për realizimin e këtij qëllimi, domosdoshmërisht drejtorive të shkollave iu imponohet që në shkenca natyrore të

pranojnë edhe nxënës me sukses të dobët apo thjeshtë pa kriterë. Shqetësimi tjetër më shqetësues janë konkurset që po shpallen gati çdo muaj. DKA për ata mësimdhënës që janë pa plotësim norme, ose nuk i ka të dhënat e sakta, ose shpall konkurse për punësimin e militantave politik. Me keqardhje ju them që e keni demotivuar rininë e komunës sonë. Me e keqja është që kandidatët kanë mundësi të pranojnë edhe pa diplomë adekuata. Për ta parandaluar një keqveprim të tillë, kërkoj nga kuvendarët që të marrin një vendim duke e formuar një komision të përbërë nga të gjitha partitë politike, me qëllim që verifikimit të dosjeve të të punësuarëve nëpër shkolla.

Lirigzon Kastrati – Faleminderit kryesues! Desha të ndërlihem te drejtori i bujqësisë rreth rregullimit të këtyre rrugëve fushore. A ka ndonjë plan të veprimit për rregullim dhe sesi do të mirëmbahen, sepse në fshatin Hoçë e Vogël dhe Brestoc, këto rrugë janë në gjendje të mjerueshme. Për drejtorin e Shërbimeve Publike, para disa jave e kam bërë edhe një reagim publik për rregullimin e rrugës kryesore. Kompania që e ka tenderin e ndriçimit publik, prishjen e rrugës gjatë punimeve nuk e ka kthyer në gjendjen e mëparshme dhe qytetarët me vetiniciativë janë detyruar ta rregullojnë dëmin e shkaktuar nga operatori ekonomik. Poashtu nga vërshimet e fundit, rëra dhe balta që ka hyrë brenda në lagje të fshatit ende nuk është pastruar, gjithashtu kam kërkuar nga qytetarët që të mos marrin iniciativë për pastrimin e lagjes, sepse komuna është përgjegjëse për këto punë.

Burim Krasniqi – Faleminderit kryesues! Urime për detyrën, shëndet dhe punë të mbarë. I nderuar kryetar i komunës, kolegë, ekzekutiv dhe të gjithë të pranishëm. Hapësira publike e ndërtuar e quajtur Shesh në qendër të qytetit pas situatës së krijuar, kam pranuar shumë telefonata për ta ngritur shqetësimin në asamble komunale dhe besoj që do të vie edhe një peticion edhe prej qytetarëve sepse po e shohin si vështirësi funksionimin normal të komunikacionit në qendër të qytetit. Është fakt që diskutimi publik është mbajtur edhe me qytetarë edhe me biznese, mirëpo sot ata po e shohin si diçka që shfaqë vështirësi. Kërkoj nga ekzekutivi organizimin e një takimi të përbashkët me qytetarë, biznese dhe banorë që jetojnë afër, ta shohim saktësisht se çfarë shqetësimi kanë dhe ta bëjmë një zgjidhje duke iu përshtatur kërkesave të qytetarëve. E dyta, në bazë informatave që i kam, komuna e Rahovecit është pa kontratë për mbikëqyrjen e projekteve. Para dy jave është vendimi i fundit i OSHP-së, e cila i ka anuluar procedurat tenderuese, duke i kërkuar ekzekutivit ta rishpallë tenderin për kompaninë mbikëqyrëse. Në këtë periudhë kohore 2023, janë filluar disa projekte si: Sheshi Qëndror, shkolla në Xërxë dhe Ratkoc dhe këtu e kam një pyetje: A ka organ mbikëqyrës -profesionist të përcaktuar nga komuna e Rahovecit që i përcjellin zhvillimet e punimeve (dhe mundësisht, a janë të brendshëm apo të jashtëm?). Drejtorat mund të jenë menaxherë të kontratave që e përcjellin dinamikën e punimeve, por nuk janë njerëz me kualifikim specifik për mbikëqyrje.

Bejtullah Deliu – Faleminderit i nderuar kryesues! Urime për detyrën e re, uroj që të kemi çasje sikurse me kryesuesin e mëhershëm. I nderuar kryetar, drejtorë, kolegë. Një pyetje për drejtorinë e Shërbimeve Publike: Është promovuar rregullimi apo asfaltimi i rrugës “Ali Sokoli”, mirëpo vështirësitë që ka rruga “Përmeti” konkretisht komplet lagjja për çasjen në rrugën “Ali Sokoli” është problematike ende dhe gropat që janë në trotuare pamundësojnë çasjen e lehtë në asfalt.

Sejfullah Sejfullahu – Faleminderit kryesues! Përshëndetje për të gjithë. Kryesues, urime për postin, por menjëherë e keni një vërejtje, ujin e pijes që e kemi afër është i nxehtë. Po drejtohem te drejtori i Shërbimeve Publike: Punën “bërlllog” e kemi andej ka fushat, kanalizimi ka dështuar dhe ka dalur mbi sipërfaqe. Kërkesa ime është se cilat janë mundësitë për intervenim këtu? ... Kërkesa tjetër është për kryetarit, rrethi në Krushë të Madhe duhet të riaktualizohet sepse pritja e gjatë për kyqje në rrugë është duke shkaktuar probleme në komunikacion. Me përgjegjësinë më të madhe ju them që vetëm dje kam pritur mbi 20minuta për t’u kyqur në rrugë.

Rumir Zhuniqi - Faleminderit kryesues! Të nderuar anëtarë të kuvendit dhe qeveri komunale. Unë i kam dy pyetje drejtuar kryetarit dhe drejtorave përkatës! Pyetja e parë është rreth kubëzimit të rrugicave në komunën e Rahovecit, përkatësisht në 2021 është lidhur një kontratë dhe kur do të fillojë kubëzimi i rrugëve në fshatin Fortesë? Sepse në njërin prej “loteve” është i shkruar kubëzimi në Fortesë. Pyetja e dytë është rreth një shqetësimi që e kanë fermerët të cilët janë dëmtuar në vitin e kalur nga breshëri dhe vërshimet, gusht-shtator. Kompenzimi i dëmeve nga Ministria e

Bujqësisë ka ndodhur pjesërisht dhe shumica e fermerëve nuk kanë përfituar nga ky kompenzim. Kanë bërë ankesë dhe është aprovuar, por kompenzimi ende nuk ka ndodhur. E di që nuk është përgjegjësi komunale, mirëpo a ka komunikim drejtoria me ministrinë dhe kur pritet të bëhen kompenzimet.

Dafina Gashi – Faleminderit kryesues! I nderuar kryetar i komunës, nënkryetar, asambleistë, drejtorë, media, të pranishëm. Meqenëse u diskutuan rrugët fushore edhe unë po ndërlidhem me këtë çështje. Po e paraqes një kërkesë të vazhdueshme që ma kanë bërë qytetarët e fshatit Nagac. Është një rrugë e quajtur “Bertone” e cila ka nevojë për rregullim sepse në mungesë të kësaj rruge, 23 ha tokë mbesin të papunuara dhe janë afër 15 familje që nuk kanë çasje në mal. Rruga është e gjatë 800m. Pyetje për drejtorinë e Kulturës: Fillimi i investimit në këndin e lojërave, a pritet që punimet të përfundojnë këtë vit?...

Leonard Morina – Faleminderit kryesues! Përshëndetje për kryetarin, drejtorët dhe të gjithë të pranishmit. I kam dy pyetje për drejtorinë e Arsimit: Në pyetjen e parë, në një konkurs të datës 30.05.2023 për staf të qerdheve janë kërkuar 16 edukatore. Edukatorja është e kualifikuar për grupmoshat 3-6 vjeq. Ky konkurs ka qenë për qerdhet e reja apo për qerdhen në qytet dhe kush do t'i mësojë fëmijët nga 0-3 vjeq, sepse këtu kërkohet një kualifikim tjetër. Pyetja e dytë është për qerdhet e ndërtuara në shekullin XXI në vitin 2023, a do të ketë vende për fëmijët me nevoja të veçanta, sepse deri më tani në secilën qerdhe nuk ka çasje për fëmijë me nevoja të veçanta. “Alamet” inxhiniera, ndërsa qerdhet e shekullit XXI nuk kanë çasje për fëmijët me nevoja të veçanta.

Kryetari – Faleminderit kryesues, njëkohësisht urime për përgjegjësinë e re! Të nderuar anëtarë të kuvendit, drejtorë të drejtorive. Do t'i jap përgjigje Burim Krasniqi rreth mbikëqyrjes. E vërteta është që ne kemi pasur mbikëqyrje të jashtme dhe zakonisht rrallë ka ndodhur që kemi qënë pa mbikëqyrje. Gjithmonë është mirë të kemi mbikëqyrje edhe pse nuk është që kemi ndonjë përvojë të mirë në këtë aspekt. E vërteta është që vendimi i OSHP-së e ka rikthyer në një pikë të caktuar procedurën e prokurimit pas një ankesë, është rishpallur procedura e re dhe shpresojmë që brenda afatit optimal do të kemi një kontratë për mbikëqyrje të jashtme. Sipas një modeli të ofruar nga USAID-i, drejtori i drejtorisë përkatëse është mbikëqyrës i drejtpërdrejt i menaxherit të kontratës dhe për shkak të peshës së investimit në projektin e Sheshit Qëndror, kemi krijuar grup punues për mbikëqyrje. Te sheshi në qendër: Problemi qëndron se ende nuk ka përfunduar projekti dhe është shumë e rëndësishme që sapo të përfundohet dhe të shënjohet do të lehtësohet qarkullimi, sepse hapësira për qarkullim të automjeteve është zgjeruar, por nuk është e paraparë që aty të parkohen automjetet. Kjo është sfidë edhe për policinë e Kosovës. Në çoftëse në përfundimin e projektit do të kemi jofunksionalitet, ne jemi të hapur për zgjidhje tjera. Sa i përket rrugëve fushore, të dy operatorët që i kemi nuk kanë arritur ta zbatojnë detyrën që e kanë për zbatimin e kontratës dhe me jemi duke e analizuar situatën që në mundësinë e parë t'i shkëpusim kontratat. Te kompenzimi i dëmeve në bujqësi dhe anvisëri, fatkeqësisht ka pasur kompenzim selektiv dhe përfituesit nuk janë të gjithë ata që janë prekur nga dëmet. Kërkoj që Ministria e Bujqësisë ta kompenzojë pjesën e mbetur të bujqëve sepse të gjitha informatat janë në favor të të dëmtuarëve dhe çdo vonesë nuk është e mirë.

Përparim Krasniqi – Faleminderit kryesues, urime për detyrën e re! Përshëndetje për të gjithë. Sa i përket pyetjes së Lirigzon Kastratit, te çështja e larjes së rrugëve, kemi komunikuar me kompaninë e autorizuar dhe gjatë kësaj jave do ta bëjë larjen e rrugëve. Kampania e ndiçimit publik i ka rikthyer kubëzat në vendin e mëparshëm, mirëpo bëhet fjalë vetëm për një vijë të ngushtë që nuk është mbushur me elemente të betonit. Bejtullah Deliu, rreth rrugës “Ali Sokoli”, është e vertetë ajo që the, ne jemi duke punuar dhe duke i trajtuar pusetat, të cilat gjatë kësaj jave do të rregullohen si dhe do të përfundojnë punimet me shtresën e dytë të asfaltit. Te Sejfullah Sejfullahu për deponit ilegale! Sefë, sa i përket deponive nuk kemi kontratë, po i pastrojmë vullnetarisht dhe do ta vazhdojmë kujdesin në atë pjesë në Krushë të Madhe. Rumir Zhuniqi, pyeti për çështjen e kubëzimit në Fortesë! Në Fortesë ende nuk kemi filluar sepse ka një mori të rrugëve që duhet trajtuar, për momentin kompania është në pushim për shkak të sezonës verore dhe në momentin që të përfundohen trotualet në fshatin Nashpallë, me gjasë do të fillojnë punimet në Fortesë. Do të kyçem edhe një herë te Sefa sa i përket rrethrotullimit! Aty është problem teknik, është hekurudha që e ndalon rrethrotullimin dhe tutje ka prona private.

Sejfullah Sejfullahu – Faleminderit për përgjigje! Ne jemi të vetëdijshëm të gjithë që mbi hekurudhë njerëzit kanë ndërtuar ndërtesa 10 katëshe dhe duhet ta gjejmë një formë. Sa i përket pronave private duhet ta nisim një procedurë për një zgjidhje me shpronësim. Sa i përket kanalizimit duket të ripunohet prej filimit sepse numri i banorëve dhe shtëpitë e banimit janë dyfishuar, prandaj duhet të bëhet një zgjidhje afatgjate.

Përparim Krasniqi – Sefë, unë jam i shkurtë dhe praktik. Është filluar procedura e tenderimit për kolektorin e ri në Krushë të Madhe dhe besoj që janë rreth 3km kolektor që do të bëhet me ritrajtimin e ri të kanalizimit në atë zonë.

Lirigzon Kastrati – Faleminderit drejtor për përgjigjet! Sa i përket asaj që the, që kompania i ka kthyer kubëzat në gjendjen e mëparshme, nuk është e vertetë dhe të jesh i sigurt që operatori nuk i ka kthyer kubëzat dhe as asfaltin ashtu siç kanë qenë. Sa i përket ndriçimit publik, e kam parë njoftimin në faqe të komunës dhe kur pritet realisht rikthimi i ndiçimit konkretisht në lagjen “Lezi”, “Krasniqi” e “Kastrati”. Poashtu, është një kanal i ujit në lagjen të varrezat, është një vijë që për shkak të të reshurave është mbyllur, duhet një investim i vogël që të hapet ajo vijë dhe uji të kalon në shtrat të lumit.

Përparim Krasniqi – Siç jeni informuar përmes faqes zyrtare të komunës, jemi duke punuar me ndriçimin e ri nga kompania “ESCO”, 7 vendbanime janë përruruar, kanë mbetur Celina dhe Zatriqi. Do të fillojmë në qytet me drita digjitale dhe me vendbanime të tjera që nuk ka ndiçim publik.

Avni Morina – Faleminderit kryesues! Urimë për detyrën e re. Të nderuar anëtarë të kuvendit, kryetar, nënkryetar, përfaqësues të LMT-së, OSBE-së, media, drejtorë të drejtorive. Te pyetja e parë e bërë nga Edona Kryeziu në lidhje me konkurset e shpallura për shkollat e mesme të larta dhe për atë profesionale. Së pari, Edona e ka harruar institucionin e arsimit profesional që është poashtu i rëndësishëm sepse ka profile të ndryshme aty. Dua të them që konkursi nuk hapet nga DKA-ja, por MASHT-i, pas analizave të marra prej shkollave. Shkollat janë të obliguara të formojnë komisione dhe në momentin e hapjes së konkursit të shpallur nga MASHT-i, janë disa kriterë që shërbejnë për kualifikimin e nxënësve sipas profileve arsimore: Suksesi i nxënësve prej klasës 6-9, numri i pikëve në test në lëndët prioritare, suksesi në atë lëndë dhe numri i pikëve në testin e arritshmërisë. Sa i përket numrit të klasave, përcaktohet nga shkolla (me kërkesë në MASHT) duke u bazuar në numër të nxënësve. Kjo nuk do të thotë që sa klasa janë të parapara në shkenca natyrore dhe shoqërore, aq do të realizohen, sepse kjo varet nga interesimi i nxënësve. Shkollimi në fjalë (i mesëm i lartë) nuk është i obliguar dhe nuk kemi të drejtë t’iu imponojmë nxënësve klasën, shkollën apo vendin. Sa i përket dosjeve të punëtorëve në arsim, në mandatin e parë drejtoria jonë e ka pranuar një vërejtje nga ZKA për mosplotësimin e dosjeve. Tani, çdo punëtorë i arsimit një kopje të dosjes e ka në DKA, një në shkollë dhe një e mban për vete. Kontrollën e dosjeve kanë të drejtë ta bëjnë vetëm dy institucione: Inspektorati i Arsimit dhe Zyra Kombëtare e Auditimit. Nuk kam të drejtë as unë si DKA, e as zyrtarët e drejtorisë. Pyetja e dytë ishte nga Leonard Morina në lidhje me qerdhet. Është e vertetë që e kemi hapur konkursin për edukatore në qerdhet e komunës së Rahovecit, nuk kufizohet vetëm për tri qerdhe sepse ne kemi mungesë kuadri edhe në qerdhet “Tulipanët”, ngase aty është trefishuar numri i fëmijëve. Konkursi është quajtur “Për Edukatore” sepse edukatorja përfshin edhe edukimin e fëmijëve 0-3 vjeq, por edhe edukimin 3-5 vjeq. Uroj që sa më pak të ketë fëmijë me nevoja të veçanta në qerdhe, e kemi një numër simbolik në qerdhen e qytetit që edhe për këta do të kemi asistencë për fëmijë me nevoja të veçanta. Shqetësimi im kryesor është se kur do të vijë inventari për qerdhe, jemi në pritje të lidhjes së kontratës nga MASHT-it gati që një vit e gjysmë. Pa inventarë, asnjëra prej qerdheve të reja të ndërtuara nga buxheti i komunës nuk mund të funksionalizohet.

Burim Krasniqi – Drejtor, pasi qerdhet nuk mund të funksionalizohen pa inventarë meqë nuk ka kontratë dhe nuk dihet se kur do të pajisen qerdhet! Pyetja është se a e keni planifikuar se çka do të bëhet me edukatorët që i keni pranuar në punë tani? Do të jenë në listë të pritjes, do të marrë pagë ose jo?

Avni Morina – Shpresojmë që deri në shtator (gjatë muajit gusht) të bëhet furnizimi i qerdheve me inventar sepse sipas zyrtarëve për infrastrukturë të MASHT-it kjo punë do të përfundojë në shtator. Po sikur të mos fillojmë në shtator, me

ligjin e ri për zyrtarë publikë të gjitha edukatorët që do të punësohen pas përfundimit të konkursit, kanë mundësi të punësohen përgjatë një viti, sipas mundësive të DKA-së.

Afrim Dina – Faleminderit kryesues! Të uroj për detyrën e re. I nderuar kryetar, nënkryetar, kolegë, të nderuar asambleistë. Përgjigjet më herët i dha kryetari, përveç sallës në Celinë, do të rregullohet edhe hapësira e jashtme me ilozim. Te pjesa e fushave sportive, me kontratën e re i kemi edhe shumë vendbanime tjera që do të përfshihen. Rreth pyetjes së asambleistës Dafina Gashi për parkun në Nagac! Është shumë e vertetë që ne kemi filluar punën aty, por për shkak të disa problemeve me operatorin, është dashur që punimet dhe procedurat të ndërpriten. Parku i parë që do të kryhet këtë vit në kuadër të DKRS-së do të jetë në Nagac, pastaj do të vazhdohet në vende të tjera.

3. Shqyrtimi dhe miratimi i propozim-vendimit për dhënien në shfrytëzim afatshkurtër të pronave Komunale në Vrajakë;

Afrim Oruqi – Faleminderit kryesues! I nderuar kryetar, nënkryetar, kolegë, anëtarë të kuvendit. Në bazë të ligjit për vetëqeverisje lokale, ligjit për dhënien e pronës me qera dhe statutit të komunës e kemi propozim-vendimin për dhënien në shfrytëzim të pronës komunale në periudh afatshkurtër deri në 15 vite në Vrajakë me nr. të parcelës 00171-0, në sipërfaqe prej 3500m² nga sipërfaqja e përgjithshme prej 4789 m².

Kryesuesi – Faleminderit drejtor! Atëherë para se të kalojmë në votim, e drejta për komente është e anëtarëve të kuvendit!

Burim Krasniqi – Drejtor, në propozim thuhet për afat të shkurtër 1-15 vjet, por nuk ceket saktë periudha! Duket t'i jepni orientim edhe afatit kohor.

Afrim Oruqi – Paragrafi në pikën 3 është i përgjithshëm! E theksova që kërkohet miratim prej kuvendit për 15 vjet.

Kryesuesi – Faleminderit drejtor! Atëherë pas sqarimeve, këtë pikë e vendosim në votim! Kush është “për”?... Kundër?... Abstenim?... Me shumicë votash kjo pikë miratohet.

4. Shqyrtimi dhe miratimi i propozim-vendimit për formimin e komisionit për zbatimin e procedurave të dhënies në shfrytëzim afatshkurtër të pronës së komunës në Vrajakë;

Afrim Oruqi – Të nderuar anëtarë të kuvendit, sipas ligjeve të aplikueshme bëhet fjalë për të njëjtën parcelë, duket të formojmë një komision për përzbatimin e procedurave dhe vlerësimin e ofertave të dhënies në shfrytëzim. Komisioni do të përbëhet prej 5 anëtarëve. Dy nga ekzekutivi, dy nga kuvendi dhe një nga shoqëria civile.

Kryesuesi – Faleminderit drejtor! Atëherë ftoj shefat e grupeve që t'i bëjnë propozimet e tyre.

Hasan Përboqi – Në emër të grupit të asambleistave të Aleancës, propozojmë Afrim Berishën.

Leonard Morina – LVV, nuk kemi propozim!

Burim Krasniqi – LDK, propozojmë Faton Ramadanin!

Sejfullah Sejfullahu – PDK, nuk kemi propozim!

Kryesuesi – Atëherë përbërja e komisionit është me këtë renditje: Afrim Berisha (AAK), Faton Ramadani (LDK). Kush është “për”?... Kundër?... Abstenim?... Unanimisht votohet komisioni.

5. Shqyrtimi dhe miratimi i propozim-vendimit për dhënien në shfrytëzim afatshkurtër të pronave komunale në Xërxë;

Erhan Morina – Faleminderit kryesues! Të nderuar anëtarë të kuvendit, para jush keni materialin për dhënien në shfrytëzim të dy parcelave që janë pronë e komunës. Parcelat konkretisht janë te depot e Matreksit dhe jepen në shfrytëzim afatshkurtër deri në 15 vite, P-01036-0 (2445 m²) që në shfrytëzim jepen vetëm prej 1600 m² dhe P-01033-2 (2162 m²) dhe në shfrytëzim do të jepet 1900 m².

Burim Krasniqi – Drejtor, disa komisione janë bërë për disa parcela te matreksi. A kanë qenë ndonjëherë këto dy parcela në procedura të dhënies në shfrytëzim?...

Erhan Morina – Këto dy parcela kanë qenë në shfrytëzim deri më tani, tani i përfundon kontrata dhe janë për herë të parë në procedura.

Kryesuesi – Faleminderit drejtor! Nëse nuk keni edhe ndonjë koment apo diskutim, ftoj anëtarët e kuvendit për votim, kush është “për”?... Kundër?... Abstenim?... Me shumicë votash edhe kjo pikë miratohet.

6. Shqyrtimi dhe miratimi i propozim-vendimit për formimin e komisionit për zbatimin e procedurave të dhënies në shfrytëzim afatshkurtër të pronës së komunës në Xërxë;

Erhan Morina – Faleminderit kryesues! Bëhet fjalë për të njëjtat parcela në Xërxë, duket të formojmë një komision për zbatimin e procedurave dhe vlerësimin e ofertave të dhënies në shfrytëzim. Komisioni do të përbëhet prej 5 anëtarëve. Dy nga ekzekutivi, dy nga kuvendi dhe një nga shoqëria civile.

Kryesuesi – Faleminderit drejtor! Shkojmë me propozimet nga shefat e grupeve të partive politike!

Hasan Përboqi – AAK, nuk kemi propozim!

Leonard Morina – LVV, nuk kemi propozim!

Burim Krasniqi – LDK, propozojmë Lirigzon Kastratin!

Melinda Iska – PDK, propozojmë Sejfullah Sejfullahun!

Kryesuesi – Atëherë përbërja e komisionit është me këtë renditje: Lirigzon Kastrati (LDK), Sejfullah Sejfullahu (PDK). Kush është “për”?... Kundër?... Abstenim?... Unanimisht votohet komisioni dhe kalon pika e gjashtë.

7. Shqyrtimi dhe miratimi i propozim-vendimit për themelimin e komitetit konsultativ për persona me aftësi të kufizuara;

Kryetari – Faleminderit! Në mungesë të drejtoreshës Sarandë, po e prezantoj. Përveç komiteve obligative të cilat janë të parapara me statut dhe ligj, janë të parapara edhe themelimi i komiteve konsultative që i shërbejnë qytetarëve të komunës sonë. Bëhet fjalë për një komitet të ri konsultativ për persona me aftësi të kufizuara dhe duhet të merret vendimi për komisionin që do ta bëjë shpalljen publike për themelimin e komitetit në fjalë, me përbërje 3 anëtarë nga kuvendi i komunës dhe dy nga ekzekutivi.

Burim Krasniqi – Këtu është ngatërruar pak, duhet me qenë dy vendime, një vendim që asambleja e themelon komitetin dhe një vendim që asambleja e themelon komisionin përzgjedhës. Sot nuk e zgjedhim komitetin, por komisionin i cili do ta zgjedhë komitetin konsultativ. Me shumë përgjegjësi konsideroj që këtu duhet të jeni dy vendime.

Isak Hoti – Faleminderit kryesues! Të nderuar anëtarë, kryetar. E kemi para vetes një vendim për formimin e komisionit. Ne duhet të hapim konkurs përmes këtij vendimi, pas aplikimit ky komision aplikuesit do t'i vendosë në test, fituesit vijnë për propozim në kuvend dhe këtu bëhet vendimi për themelimin e komitetit.

Burim Krasniqi – Këtu thotë: Vendim për themelimin e komitetit konsultativ për persona me aftësi të kufizuara, titulli i vendimit është ndryshe dhe brendësia ndryshe! Ne mund t'i nxjerrim dy forma të vendimeve: Një vendim me të cilin asambleja e aprovon themelimin e komitetit dhe një vendim për themelimin e komisionit. Ose titulli i vendimit është gabim, ose procedurat.

Isak Hoti – Atëherë mund të jetë edhe gabim teknik titulli, por pika 3 e vendimit i qartëson gjërat. Nuk guxojmë ta nxjerrim një vendim për themelimin e komitetit pa e bërë përzgjedhjen e këtyre pesë anëtarëve.

Burim Krasniqi – Mos më keqkupto! Po të them që titulli i vendimit është gabim, duket të përmirësohet, e votojmë edhe shkojmë tutje, shumë e thjeshtë.

Kryesuesi – Faleminderit zyrtarit ligjor! Atëherë ftoj shefat e grupeve për propozim të anëtarëve për komision.

Hasan Përboqi – AAK, e propozojmë asambleistin, Sinan Kryeziu!

Leonard Morina – LVV, e propozojmë Vlora Vuçitërna Çmega!

Burim Krasniqi – LDK, nuk kemi propozim!

Sejfullah Sejfullahu – PDK, propozojmë Melinda Oruqi Iska!

Kryesuesi – Atëherë përbërja e komisionit është me këta emra: Sinan Kryeziu (AAK), Vlora Vuçitërna (LVV) dhe Melinda Oruqi (PDK). Kush është “për”?... Kundër?... Abstenim?... Me shumicë votash kalon përbërja e këtij komisioni.

8. Shqyrtimi dhe miratimi i propozim-vendimit për miratimin e memorandumit të mirëkuptimit për mbulimin e pjesshëm të shpenzimeve të Strehimores “Shtëpia e Sigurt”;

Kryetari – Në këtë rast vazhdojmë me respektimin e memorandumit me “Shtëpinë e Sigurt” në Gjakovë. Fjala është për 2500€ që duhet të marrim vendim në kuvend që t’ia japim atyre çdo vit (për tri vite).

Burim Krasniqi – Kryetar, a mund ta kemi si informacion se çka shërben “Shtëpia e Sigurt”?

Kryetari – Informacione të detajizuara është e vështirë të japim sepse nuk është vendi i duhur, por në “Shtëpinë e Sigurt” trajtohen qytetarët që kanë probleme në familje, dhunë në familje dhe probleme të tjera.

Kryesuesi – Faleminderit kryetar! Atëherë e vendosim në votim këtë pikë, kush është “për”?... Kundër?... Abstenim?... Unanimisht kalon pika e tetë. Vazhdojmë me një pauzë një orëshe...

Kryesuesi – Përshëndetje edhe një herë, vazhdojmë me pikën e nëntë.

9. Shqyrtimi dhe miratimi i ndryshimit dhe i plotësimit të vendimit 01 Nr.408/22, i datës 28.12.2022, për ndryshimin dhe plotësimin e vendimit 01 Nr.263/22, i datës 25.1.2022 për themelimin e Komitetit për Politikë dhe Financa;

Kryetari – Duke mos humbur kohë, tani jemi në një situatë ku duhet ta bëjmë plotësim-ndryshimin e vendimit për anëtarët e KPF-së, sepse kemi kryesues të ri. KPF-ja ka një formulë të përfaqësimit që rregullohet me ligj. Besoj që grupi politik më i madhi duhet ta bëjë një reflektim dhe grupet tjera t’i bëjnë propozimet.

Burim Krasniqi – Mendoj që duke e pasur parasysh formulën, ne si LDK nuk kemi çka të diskutojmë sepse gjërat dihen, grupet tjera le të shkojnë tutje.

Hasan Përboqi – Faleminderit kryesues! Ne si grup më i madh parlamentar në asamble, si cdo herë kemi treguar konstruktivitet edhe kësaj here kemi vendosur të kontribuojmë në atë drejtim që mos të bllokohet situata më tej në plotësim-ndryshimin e vendimit për KPF. Me vetëdëshirë asambleisti, Rumir Zhuniqi ka vendosur të tërhiqet, për arsye që Aleanca çdo herë është deklaruar që 50% të jenë femra, 50% meshkuj, por kësaj radhe kemi vendosur që femrave me iu dhënë hapësirë më të madhe. Shqipe Kryeziu dhe Bjondina Kleqka vazhdojnë në KPF, kryesuesi shkon me automatizëm.

Defrim Kafexhiu – Faleminderit kryesues! I nderuar kryetar, nënkryetar, kolegë, drejtorë. E falënderoj Hasanin për zemërgjerësinë, po ai nuk po na jep asgjë! Nëse e ka mirëkuptimin e anëtarëve të vet, mund të na jepni edhe një anëtarë ekstra, d.m.th të largohet edhe një anëtar prej KPF-së, përndryshe tre anëtarë janë të paraparë me ligj. Nuk ka mirëkuptim këtu e as zemërgjerësi, në bazë të përqindjes së votave që i ka, tre anëtarë i ka Aleanca, përqindja tjetër i takon LVV-së dhe dy partive tjera.

Hasan Përboqi – Ish kryesues, faleminderit për udhëheqjen që e keni bërë më herët në Kuvend dhe KPF, besoj që si Aleanca të kemi vlerësuar më mirë sesa grupet tjera. Për ta kërkuar edhe një anëtar shtesë në KPF, me zemërgjerësinë që e kemi ndoshta edhe do t’ju jepnim edhe një, por çfarë të bëjmë kur vullneti i qytetarëve ka qenë i tillë që ne ta kemi përfaqësuar në KPF kështu.

Ilir Pallqa – Faleminderit kryesues! Me leje, a më lejohet të flas një minutë jashtë rendit të ditës?

Kryesuesi – I nderuar, nuk lejohet!

Bejtullah Deliu – Faleminderit i nderuar kryesues! Në këtë pikë që duhet të bëhen këto ndryshime, vullnetarisht tërhiqem nga KPF-ja për t’i lënë hapësirë subjekteve në renditje të duhur.

Kryesuesi – Faleminderit zt. Deliu! Atëherë pas diskutimeve, vazhdojmë me propozime nga të gjitha grupet.

Ilir Pallqa – Thirrja për propozim duhet të niset nga grupi më i madh, e nise prej LVV-së e po ia bën “hyzmetin” për të ardhmen.

Hasan Përboqi – Nuk ka nevojë për propozomë të reja sepse është plotësim-ndryshim, Shqipja edhe Bjondina mbeten, Rumiri tërhiqet, kryesuesi shkon me automatizëm.

Merisa Sharku Vuçiterna – Faleminderit, përshëndetje për të gjithë! Prej LVV-së, propozojmë dy emra: Leonard Morina, Defrim Kafexhiu.

Kryesuesi – Faleminderit! Atëherë nga propozimet e dhëna nga grupet e partive në kuvend, me këtë përbërje të komitetit e vendosim në votim, kush është “për”?... Kundër?... Abstenim?... Unanimisht kalon kjo pikë me këta anëtarë: Arbër Zenuni, Shqipe Kryeziu, Bjondina Kleqka (AAK), Leonard Morina, Defrim Kafexhiu (LVV), Melinda Oruçi Iska (PDK), Burim Krasniqi (LDK).

10. Shqyrtimi dhe miratimi i ndryshim-plotësimit të vendimit 01 Nr.265/22, i datës 25.1.2022, për themelimin e Këshillit Komunal për Siguri në Bashkësi (KKSBB);

Kryetari – Edhe këtu poashtu ka një ndryshim-plotësim, për shkak se Fadil Sylka ka qenë anëtar i KKSBB-së si përfaqësues i bizneseve, tani është ndërruar përfaqësuesi. Mustafë Korenica është tani dhe duhet të ndodh ky ndryshim.

Ilir Pallqa – Faleminderit kryesues! Me leje edhe një herë, a më lejohet të flas një minutë jashtë rendit të ditës?

Kryesuesi – I nderuar përgjigja e parë ishte që nuk lejohet, të kërkoj ndjesë. Faleminderit për mirëkuptim! Atëherë meqë nuk ka diskutime tjera lidhur me këtë pikë, e vendosim në votim! Kush është “për”?... Kundër?... Abstenim?... Me shumicë votash kalon edhe kjo pikë e rendit të ditës.

11. Shqyrtimi dhe miratimi i vendimit 01 Nr.326/22, i datës 31.5.2022, për përbërjen dhe organizimin e Komitetit për Shëndetësi dhe Përkujdesje Sociale;

Nënkryetari – Përsëritet kryesues, urime pozitive e re. Gjithashtu edhe këtu kemi të bëjmë me një plotësim-ndryshim në përbërje të Komitetit për Shëndetësi dhe Përkujdesje Sociale. Edmond Kabashi vullnetarisht është tërhequr dhe ne e kemi një propozim për ndryshim si eksperte të jashtme, Zana Çmega. Kërkojmë nga ju ta miratoni këtë vendim.

Lirigzon Kastrati – Meqenëse jam anëtar i këtij komiteti, dua ta falënderoj Edmondin, i cili ka qenë kontributdhënës i çmuar gjatë punës së komitetit. Uroj që edhe anëtarja e re të jetë me njohuri të fushës përkatëse.

Kryesuesi – Faleminderit! Nëse edhe dikush tjetër nuk ka diçka për të thënë rreth kësaj pike, e vendosim në votim! Kush është “për”?... Kundër?... Abstenim?... Me shumicë votash kalon edhe kjo pikë.

12. Shqyrtimi i Raportit Financiar janar - qershor 2023;

Afrim Limani - Përsëritet kryesues, kryetar, nënkryetar, anëtarë të kuvendit. Raporti 6 mujor financiar kësaj radhe është më voluminoz. Përveç pjesës kryesore të inkasimit të të hyrave dhe pjesës së shpenzimit të buxhetit, në këtë raport janë të inkuorporuar edhe pjesa e obligimeve kontraktuale dhe raporti mbi kontratat e lidhura nga Zyra e Prokurimit. Këtë informata nuk e kemi obligim t'i fusim në këtë raport, por për hirë të transparencës kemi menduar që këto të dhëna të jenë pjesë e raportit. Të hyrat për 6 mujorin e parë për vitin 2023 në total janë 1.029.916€ dhe nëse bëjmë një krahasim me të njëjtën kohë me vitin e kalur, kemi një rezultat pozitiv prej 431.392€, llogaritja është për të hyrat e rregullta. Shpenzimi i buxhetit në total është 53.56%. Në pozicionin e pagave 56.24%, mallra dhe shërbime 53.15%, komunal 51.18%, subvencione 57.46% dhe shpenzime kapitale 49.72%. Në fund i kemi të paraqitura edhe obligimet financiare që në total janë prej 388.883€.

Rasim Fazliu – Faleminderit kryesues! E falënderoj drejtorin për prezantimin e Raportit Financiar për 6 mujorin e parë të këtij viti. Drejtor, ndoshta janë disa lëshime teknike dhe është mirë t'i përmirësoni sepse është një dokument i rëndësishëm. Në tabelën 1.6, krahasimi i të hyrave të realizuara sipas kodeve ekonomike 2022-2023 të kodit i tatimit në pronë 40/110, thotë: Planifikimi është 423.250€, e kur të dalim në anën tjetër të planifikimi dhe realizimi i tatimit në pronë dhe kur shkojmë përsëri të planifikimi për vitin 2023, shkruan: 295.257€, d.m.th nuk përputhen shifrat. Të shpenzimet, sipas kategorive ekonomike të paraqitura grafike buxhetin e keni shpenzuar mirë për këtë gjashtë mujor. Më poshtë, në faqe 12, të mallrat dhe shërbimet sipas kodeve ekonomike, i kemi disa shënime këtu që krahasohen me vitin 2022 dhe 2023. Të disa kode kemi një ndryshim goxha të madh, psh. Kodi 13/420, shërbimet e avokaturës në vitin 2022 i kemi 15.000, ndërsa në 2023 i kemi 31.000€. Kodi tjetër 13/480, shpenzimet për anëtarësim në vitin 2022 janë hargjuar 8000€, ndërsa në 2023 janë hargjuar mbi 30.000... kështu me radhë. Do të dëshiroja sqarime se pse kanë ndodhur këto ndryshime kaq të mëdha!

Burim Krasniqi – Faleminderit kryesues! Fillimisht të të hyrat nuk kam vërejtje të tabelat. Sipas të hyrave të realizuara në 2023 janë 671.526€, megjithatë e kemi një vendim të qeverisë së Kosovës për faljen e tatimit në pronë

deri në 100€! A do të ndikojë kjo në të hyrat e tatimit në pronë dhe a ka procedurë se çka do të ndodh me ata që e kanë paguar tatimin në pronë? Do të ketë kthim të mjeteve, apo zbritje të tatimit në pronë në vitin e ardhshëm? Te çështja e obligimeve kontraktuale (tab.3.7), tri kontratat e para janë obligime financiare, jo kontraktuale. Tjetër, të gjitha kontratat që janë të lidhuara prej janar-qershor 2020, sot janë obligime financiare me vlerë 1.4 milion. Duke e përfshirë komplet sipas raportit, nënkupton që Komuna e Rahovecit, sot, i ka 17.061.145€, obligime kontraktuale dhe financiare. Në qoftëse kontratat iu përmbahen afateve tre vjeqare (afatit kohor), a rrezikon kjo në mundësinë e lidhjes së kontratave të reja ndërkohë në mes komunës dhe operatorëve të tjerë?

Hasan Përboqi – Faleminderit kryesues! E falënderoj drejtorin për paraqitje të hollësishme të raportit financiar. Poashtu, e falënderoj për paraqitjen në detaje të pjesës së obligimeve financiare dhe kontraktuale që i ka komuna jonë. Kjo është një risi, përkundër asaj që nuk është obligim ligjor. Të hyrat janë rekord të shënuara për këtë 6 muaj dhe njëkohësisht duhet t'i falënderojmë qytetarët e Komunës së Rahovecit që janë tatimpagues të rregullt. Te pjesa e realizimit apo shpenzimit të buxhetit, janë rreth 53% e buxhetit është shpenzuar dhe duke e llogaritur me muaj, shpenzimi i buxhetit po shkon në mënyrë të duhur dhe njëkohësisht kjo gjendje tregon një performancë të mirë në realizimin e projekteve kapitale të parapara në buxhet për vitin 2023.

Leonard Morina – Faleminderit kryesues! Për dallim nga shefi i grupit të AAK-së, unë i ka parë shpenzimet jo në mënyrë të duhur! Psh. te veturat, Komuna e Rahovecit ka shpenzuar 77.973€ për 6 muaj në vettura të komunës. Kjo i bie që për secilin muaj ka shpenzuar 12.995€, këtu bëhet fjalë për sigurim, mirëmbajtje dhe karburante. Ndërsa vetëm për karburante ka shpenzuar 37.000€ brenda kësaj periudhe. Në një komunë kaq të vogël dhe të varfër e të shpenzoni në derivate mbi 37.000€, më duket që është shumë. Te kodi 133, udhëtimet zyrtare brenda vendit: Për gjashtëmujorshin e parë keni shpenzuar 28.000€ ose 4700€ në muaj. Nëse ka mundësi një sqarim se për të cilat udhëtime zyrtare bëhet fjalë? Te kodi 13420, përfaqësimi i avokaturës: Për gjashtë muaj keni paguar mbi 31.000€ shpenzime të avokaturës ose mbi 5000€ në muaj, kësaj ia shtojmë mbi 9000€ që i keni paguar për vendimet e gjykatës dhe i bie diku 40.000€ brenda 6 mujorshit. Te kodi 14310, dreka zyrtare: Për 6 muaj keni shpenzuar 3515€ ose mbi 500€ në muaj. Appetit i madh në paranë publike. Kryetar, qeverisja e mirë shkon duke e rritur cilësinë dhe duke i ulur shpenzimet, ju keni vepruar në të kundërtën. Në vitin 2022 në 6 mujorshin e parë keni shpenzuar 763.000€, ndërsa për 6 mujorshin e parë të vitit 2023 i keni shpenzuar 1.171.000€ ose 408.000€ më shumë sesa në vitin 2022. Pse ka ndodh kjo diferencë?

Bejtullah Deliu – Faleminderit i nderuar kryesues! Drejtori i Financave njihet dhe lavdërohet për saktësi, por te tabela 1.2, te planifikimi në 2023 është 722.801€, ndërsa realizimi është 1.290.916€ që d.m.th për 317.115€ është jashtë normës.

Afrim Limani – Fillimisht po i përgjigjem Burimit! Te pyetja për tatimin në pronë, te falja e 100€ që do të ndodh vitin e ardhshëm dhe ata të cilët kanë paguar hyjnë në parapagim. Sipas analizave që i kemi bërë ne, i kemi rreth 65% tatimpagues që janë të ngarkur prej 100€ të poshtë dhe përafërsisht ne do të dëmtohem 500.000€. Te obligimet kontraktuale, e thash edhe në fillim nuk e kam obligim t'i paraqes, por e bëj për shkak të transparencës. Në raportin që e keni ju para vetes, obligimet kontraktuale fillojnë që nga viti 2019 deri në 2022. Obligimet e vitit 2019 i kemi përfunduar me ekzekutimin e bartjes së mjeteve, gjithashtu i kemi përfunduar edhe disa të tjera të vitit 2020. Atëherë, vlera e obligimeve kontraktuale nga viti 2018 deri në fund të vitit 2022 është 27.198.000€, prej këtyre janë paguar 10.436.000€ dhe kanë ngelur papaguar edhe 16.762.000€ dhe realisht ne e shëndrojmë në oblimi financiar, sepse obligim financiar llogaritet në momentin e pranimit të faturës. Nga 16 milionshi, nëse i zbresim mallrat dhe shërbimet (2.463.000€), mbesin edhe 14.298.000€ obligime kontraktuale dhe financiare. Në vitin 2023, vlera e parashikur e kontratave deri në muajin e gjashtë është 11.841.000€. Kontrata të lidhura i kemi 2.182.000€. Te Rasim Fazliu, mësues, është e vërtetë që e the atë, por, planifikimi i tatimit në pronë prej një faqe në tjetrën ndyshon, sepse në faqen e dytë është totali për gjashtë mujorin e parë, ndërsa te faqja e parë është në total për gjithë vitin fiskal. Hasan, faleminderit shumë për ato fjalë. Leonard i bëri disa pyetje, psh. shpenzimi i karburantit: Duhet ta dini një gjë që vetëm QKMF-ja mbi 50% i hargjon karburante dhe mjete për sevisim, sepse janë pesë autoambulanca që vazhdimisht janë në qarkullim.

Mos ta nderlidhim shpenzimin vetem te objekti T komunës. Te Bejta, planifikimi në total është prej 1.445.000€, mirepo ne e kemi ndarë dhe për gjashtë muaj e kemi marrë një mesatare.

Rasim Fazliu – Drejtor, unë të mirëkuptoj ty që the, aty planifikimi është bërë për gjithë vitin, e këtu vetëm për gjashtë muaj. Mirëpo, kur e heqim shumën në tabelën 2.1 prej tabelës tjetër, ndryshimi del vetëm 27.000. A i bie kjo që për gjashtë muaj tjerë, tatimi në pronë do të vë vetëm 27.000? Faqe 5, te tabela 1.6, në fillim është: Tatimi në pronë i planifikuar në vitin 2023 është 423.250€. Te tabela 2.1 (faqe 6), thotë: Të planifikuara për vitin 2023 janë 395.257€.

Afrim Limani – Në faqe 5, te planifikimi i tatimit në pronë i kemi dy shtylla: Tatimi në pronë dhe tatimi në tokë dhe të dyja bashkë bëjnë 768.000, kurse ne i kemi të ndara dhe të përpjesëtuara në bazë gjashtë mujore.

Kryetari – Faleminderit kryesues! Besoj që drejtori i Financave dha sqarime të hollësishme. Ligji mbi tatimin në pronë është miratuar në kuvendin e Kosovës edhe në lexim të dytë. Në këtë ligj nuk është përfillur as Asociacioni i Komunave të Kosovës dhe as komunat individuale. Falja prej 100€ me justifikime që i ndihmojnë qytetarët është legjitime, por me këtë gjë dëmtohet shumë interesi i qytetarëve në komunat e Republikës së Kosovës, sepse nga viti 2024 parashihet të kemi më pak të hyra nga tatimi në pronë. Është situatë paradoksale dhe padrejtësi në intresin publik, shkelje dhe cenim i autonomisë. Qeveria duhet t'ia kompenzojë komunave vlerën që ia fal qytetarëve, sepse komunat mbesin keq. Duhet të mos dekretohet ky ligj, ose duhet të shkojë në Gjykatë Kushtetuese dhe të kthehen në parlament për përfillje të interesit të komunave dhe asambleve komunale sepse ka shumë paqartësi. Çështja e anëtarësisë: Mos të harrojmë që ne jemi anëtar të asociacionit të komunave të Republikës së Kosovës. Kemi një projekt të përbashkët me Agjencinë e Zhvillimore Rajonale dhe kemi një anëtarësim të ri me Unionin e Bashkive Shqiptare në Rajon, (anëtarësia kushton 20.000€ në vit). Te Leonardi, rreth udhëtimet zyrtare brenda vendit: Kodet nuk i krijojmë ne, i krijon Ministria e Financave. Pra, nuk bëhet fjalë për udhëtimet e zyrtarëve të komunës, por për transportin e nxënësve, se udhëtimet e zyrtarëve të komunës brenda vendit nuk paguhet hiç. Unë kam pasur udhëtime zyrtare jashtë vendit, por nuk i kam marrë buxhet komunës. Drejtorët nuk kanë pasur udhëtime zyrtare. Apetit për ushqim kemi, darkat e drekat janë të parapara me ligj. Appetit ka edhe Kuvendi i Komunës dhe me mirëkuptim në mes drejtorit të Financave dhe ish kryesuesit, Defrimit, ju i keni dy darka, që gjithashtu kanë një kosto. E kemi edhe iftarin për kohën e Ramazanit dhe disa pozicione në kulturë. Një pyetje tjetër logjike që nuk e bëri askush këtu! Pse ka shumë sivjet inkasomë të tatimit në pronë? Ju e dini që qeveria e Kosovës bëri një "hallakamë" të madhe, njerëzit nga frika që po i bie të paguajnë edhe një herë më shumë, vraponin për pagesa të tatimit në pronë. Kjo është një indikator që qeveria ndonjëherë është mirë të bëjë këso eskivazhe, por edhe më mirë është që mos ta bëjë një ligj të tatimit në pronë pa u konsultuar me komunat. Mendoj që Raporti Financiar është në pajtim të plotë me rregullat e shpenzimit të buxhetit, gjithashtu te realizimi i buxhetit jemi shumë mire me 53% në gjashtëmujorin e parë, ndërsa deri në fund të vitit besoj që të jemi deri në 97%.

Burim Krasniqi – Faleminderit kryesues! Drejtor, po ndalem në dy çështje shumë shkurtë. E para, në bazë në analizës tënde që e the, i bie që 2023 të përfundojë me rreth 15 milion € obligime! Bazuar në KAB, për 2024 janë 8.5 milion investime kapitale dhe mallra dhe shërbime, në çoftëse i marrim këto obligime për dy vite, kjo nënkupton që për dy vitet e ardhshme vetëm 2 milion € keni të drejtë të lidhni kontrata, në çoftëse nuk "zhëgiten" projektet. Tjetra, te tabela 3.6 (faqe 15), te çështja e planifikimit dhe realizimit të kontratave: Në çoftëse i mbledhim planifikimet e kontratave te Zyra e Prokurimit, shumat që i keni aty nuk bëjnë 11 milion në fund, është gabim. Planifikimi sipas raportit tënd është 11.86 milion, kontratat janë 2.2 milion. Planifikimi sipas raportit nga Zyra e Prokurimit është 1.65 milion, (200.000 më pak), kontratat është 4.357 (4 milion e 375 mijë €). Raporti i Zyrës së Prokurimit del më shumë sesa Raporti i Drejtorisë së Financave rreth 2.1 milion €. Në fund, për korrektësi, raporti i ka 19 faqe dhe jo 17.

13. Shqyrtimi i Raportit të ZKA-së, për vitin 2022;

Kryetari – Është lajm i mirë që Komuna e Rahovecit ka opinion të pamodifikuar për pasqyrat financiare për vitin 2022. Është lajm i mirë që ne kemi shënuar progras në zbatimin e rekomandimeve që kanë qenë në 2021, poashtu është shumë mirë që kemi zvogëlim të numrit të rekomandimeve për 2022 dhe realisht mund të themi që ky është një nga raportet më të mira në historinë e auditimit nga ana e ZKA-së. Rekomandimet e fundit kanë qenë rreth disa kontratave që janë

nënshkruar pa zotimin e mjeteve ose zotimi i mjeteve është bërë me vonë. Këto shqetësime menjëherë i kemi agresuar përmes themelimit të grupit punues për zbatimin e planit për adresimin e rekomandimeve. Për dallim prej vitit të kaluar, pasi që të gjitha kriteret janë të plotësuar, kësaj radhe Komuna e Rahovecit mund të jetë përfituese e Grantit të Performancës (mbi 2 milion €). Kanë qenë 14 rekomandime, tani janë 9 dhe opinioni është pozitiv për komunën tonë. I falënderoj të gjithë për këtë gjë.

Defrim Kafexhiu – Përsëritetjeh edhe një herë për të gjithë! Më herët hamoya që t'i përsëritet monitruarit nga organizatat dhe mediat. Një kritikë për Leonardin, që më herët i përmendi drekat zyrtare, "a nuk pate ndonjë të keqe tjetër për ekzekutivin, po veç te drekat zyrtare". Te çështja e rendit të ditës, saktësisht te Raporti i ZKA-së për Komunën e Rahovecit, kryetari i përmendi të mirat dhe kualifikimin e duhur që e ka marrë komuna dhe mund të themi lirisht që është për t'u përsëritet. Dua të ndalem te pika 2.1 (faqe 8), çështja A1, parregullsitë te procedurat e prokurimit: Prokurimi në një institucion në këtë rast në Komunën e Rahovecit, është një derë e "hambarit" të të mirave të përgjithshme të taksave të qytetarëve dhe rrjedhimisht prej aty lidhen kontratat, blihen mallrat dhe shërbimet tjera me paratë publike. Janë disa shkelje të lehta, psh: Te një operator ekonomik që e ka fituar një tender, ka ofruar për menaxherin e projektit, referencë për përvojën e punës 4 vjeçare edhe pse me kontratë është kërkuar që menaxheri t'i ketë së paku 7 vite përvojë pune. Forma e prezantimit të dokumenteve psh: Certifikatat ndërkombëtare, është kërkuar që t'i prezantohen autoritetit komunal që të jenë origjinale, por ato kanë qenë kopje të zakonshme. Një shkelje tjetër është që, në njoftimin për kontratë është kërkuar Plani i Menaxhimit të Trafikut të jetë i nënshkruar nga inxhinieri i komunikacionit, përderisa kontraktuesi nuk kishte dëshmi që në ofertën e tij kishte inxhinier të komunikacionit. ZKA këto shkelje i cilëson si parregullsi edhe pse unë besoj që këtu ka hapësira dyshuese për keqpërdorime gjatë proceseve të prokurimit. Psh: Furnizim me pelet për nevojat e Komunës së Rahovecit me vlerë 272.000€, operatori ekonomik me çmimin më të lirë të ofertuar 243.000€, ishte eliminuar nga procesi me arsyen që e kishte ofruar listën "kinse" të panënshkruar dhe të pavulusur të projekteve të realizuara. D.m.th me ligj të prokurimit, oferta më e lirë duhet të merret për bazë, por ja që komisioni për vlerësimin e ofertave e ka eliminuar ofertën më të lirë. Operatori i eliminuar kishte ngarkuar në sistemin E-prokurimi listën e nënshkruar dhe të vulosur të projekteve të realizuara. Kjo besoj që është një shkelje më e madhe dhe lindi dyshimet për keqpërdorime në këtë proces të prokurimit. Poashtu edhe fituesi i këtij tenderi e ka ofruar sigurimin e ekzekutimit të kontratës me afat të vlerfshmërisë dy muaj më pak sesa është kërkuar me kushte të veçanta të kontratës. Nëse për një arsye është hedhur poshtë ofertuesi më i lirë, kjo është një arsye që të eliminohet edhe fituesi i tenderit. Një pikë tjetër që nuk është përgatitur Plani për Menaxhimin e Kontratës, këtu besoj që përgjegjësia bie mbi kryetarin e komunës apo te përcaktimi i menaxherëve të kontratës. Psh: Në rregullimin e shtratit të rekës Rahovec – Fortesë, menaxher i kontratës është Berat Duraku (ekonomist – drejtor i Bujqësisë) dhe rrjedhimisht mendohet që mund të jetë një mbikëqyrje jo e duhur në procesin e implementimit të projektit. Ndikimi prej këtyre gjetjeve (parregullsive) që i ka gjetur ZKA-ja, thotë që kjo ka ndodhur si rezultat i mbikëqyrjes dhe kontroleve të pamjaftueshme në procedurat e prokurimit, në procesin e vlerësimit të tenderëve dhe në pakujdesinë e menaxherëve të kontratave. Të gjitha këto, përgjegjësinë e kanë te kryetari i komunës, përderisa me vendim të tij formohet edhe komisioni për procesin e vlerësimit të tenderëve dhe përzgjedhjen e menaxherëve të kontratave. ZKA-ja ia ka qëlluar 100% sepse po e shohin në implementimin e projekteve kemi zhagjitje të proceseve, projekte jo të kryera me kohë të përcaktuar me kontratë dhe kemi bllokim të rrugëve që njëkohësisht shkaktojnë probleme në komunikacion, që gjithashtu është e padrejtë në krahasim me funksionimin dhe jetën e qytetarëve të Komunës së Rahovecit. Për t'i shuar këtu dyshime që i kemi për keqpërdorime, i bëj thirrje kryetarit të komunës që t'i jep arsyetimet e duhura.

Kryetari – Faleminderit! Mirë është që e keni mundësinë tani ta lexoni Raportin e Auditimit dhe ta pasqyroni si të lexuar. Raporti është zyrtar dhe është publik në web-faqen e ZKA-së dhe të Komunës së Rahovecit. Për dyshimet që u përpoqe t'i shpërfaqësh këtu e që ta dëgjojnë qytetarët e Komunës së Rahovecit kudo që ndodhen, raporti për çdo dyshim shkon në prokurori dhe prokuroria është kompetente t'i spastrojë situatat të cilat mund të prodhojnë paqartësi. Fakti që ne jemi pajtuar me ato të gjetura, nuk e kemi mohuar faktin që ka dobësi në disa çështje për të cilat janë

përgjegjesitë e ndara. Zyra e Prokurimit konsiderohet si zyrë e kryetarit dhe kryetari i komunës është e vetëdijshme që formon komisione për vlerësim, por nëse komisionin nuk e kanë vlerësuar drejt, ata përgjigjen dhe jo kryetari i komunës. Sipas ligjit të prokurimit, oferta më e lirë është bashkë me operatorin e përgjegjshëm, në çoftëse një operator nuk i posedon të gjitha dokumentet të futura në sistem online dhe pse është më i lirë, kjo nuk d.m.th që ai duhet ta fitojë tenderin. Sa i përket çështjes së vonësave të zbatimit të kontratës, kjo nuk ka të bëjë fare me atë që e tha parafolësi. Ekzistojnë disa faktorë pse mund të vonohen kontratat, mund të mos ketë buxhet, rritja e çmimeve – ndalon operimin. Çështja e mungesës së një inxhinieri të komunikacionit, a e dini që asnjë kompani që i ka paraqitur ofertat e veta nuk ka pasur inxhinier të komunikacionit, vetëm që në procedurë ka mbetur i tillë. Kuptohet që nuk ka reaguar askush, lenda ka kaluar, është lidhur kontrata dhe Auditori e ka gjetur. Të gjitha këto dilema hiqen, në momentin kur Njësia për Hetimin e Krimeve Ekonomike vlerëson që duhet ta ftojë në intervistë dikë. Kësaj radhe të gjeturat kryesisht janë të natyrës teknike, të cilat natyrisht hapin dilemë për sqarim, prandaj e kemi një plan dhe një grup punues për të shënuar progres në zbatimin e këtyre rekomandimeve. Psh: Nëse e dimë që nuk ka inxhinier me 7 vjet përvojë pune, duhet të vendoset përvoja e punës “deri” në shtatë vjet, d.m.th janë çështje që rregullohen me kritere që i vendosë Zyra e Prokurimit në pajtim me udhëzimet e marra nga KRPP. Pra, përvoja e punës, operatori më i lirë dhe më i përgjegjshëm, pamjaftueshmëria në mbikëqyrje, vonesa e kontratave, lëshimi i urdhërblereve pasi është pranuar malli, të gjitha këto janë duke u adresuar sepse janë rekomandime të reja. Lufta jonë e përbashkët është t’i zbatojmë këto dhe mund të na dalin të reja përsëri për vitin 2023, sepse një opinion i ZKA-së pa rekomandime nuk ka dhe nuk ekziston në glob. E përsëritës Afrim Limanin dhe kuvendin e komunës për presionin e bërë në adresë të përmirësimit të dukshëm dhe sot e kemi një raport shumë pozitiv.

Defrim Kafexhiu – Faleminderit kryesues! Nuk do ta kërkoja replikën, por gjithashtu nuk mund ta pranoj që dikush të më hedh “hi syve”. Sa i përket fushatës, zgjedhjet janë largë, kur të vie koha e tyre do të bëjmë edhe fushatë, nuk e kemi atë problem! Te parregullsitë e lehta të përmendura, ta zëmë, inxhinierin e komunikacionit pasi që nuk e kanë kompaninë, është shumë në rregull dhe kuptohet! Te çështja e përzgjedhjes së ofertuesit më të lirë, përderisa e ka dokumentacionin e kompletuar sepse këtu thotë që, operatori ekonomik që është eliminuar kishte ngarkuar ofertën elektronike në sistemin e Prokurimit, listën e nënshkruar dhe të vulosur të projekteve të realizuara, teksa komisioni e ka hedhur poshtë për shkak të mungesës së vulës dhe nënshkrimit! Te vlerësimi se unë a e kuptoj, lexoj dhe a mund ta komentoj raportin e ZKA-së, nuk e vlerësoni ju, por qytetarët e Komunës së Rahovecit. Unë vetëm po e transmetoj atë që po e thotë Auditori. Poashtu edhe unë qytetarët i respektoj njejtë, qytetarët janë të Republikës së Kosovës, banorët janë të Komunës së Rahovecit dhe nëse dëshiron t’i jep konotacion edhe këtyre shprehjeve, atëherë nuk është problemi im.

Kryetari - Serbia, përmes rezolutës 1244 ka tentuar që të jetë vetëm “banorë” sepse Kosova është territor. Termi “qytetarë” është zyrtar dhe i bazuar në Kushtetutën e Republikës së Kosovës. Kosova është shtet i qytetarëve, jo i banorëve. Të gjithëve iu drejtohem “Të nderuar qytetarë”, sepse ky term nuk ka të bëjë me atë a jeton në fshat apo qytet, por është nocion që gërshëton komponenten shtetërore. Për çfarëdo dyshimi të paraqitur në Raportin e ZKA-së, ekziston një institucion që quhet Njësia për Hetimin e Krimeve Ekonomike dhe nëse ata vlerësojnë se ky që e ka fituar tenderin dhe kinse komisioni nuk e ka vërejtur listën e nënshkruar, atëherë komisioni përgjigjet, respektivisht shefi i prokurimit.

Burim Krasniqi – Faleminderit kryesues! Kryetar, ajo që nuk më pëlqej është që nuk është mirë të “gjuajmë” te zyrtarët tanë sepse shumë herë po mburremi me punën e mirë të tyre. Pa dashur ta luaj rolin e hetuesit, por ka gabime dhe lëshime dhe është herët gjithçka. Është mirë për qytetarët e Rahovecit që Raporti ka dalur i pamodifikuar, por brenda i ka disa gjëra jo të lavdërueshme! Nuk po gjykoj dhe nuk i njoh procedurat e prokurimit, kam konsultuar zyrtarë - shokë të prokurimit që kam, kurrë nuk jam marrë me këtë çështje dhe asnjëherë nuk kam qenë as në komision vlerësues në karrierën time, por më kanë thënë që momentin kur operatorit i mungojnë ndonjëri prej dokumenteve që përfaqësojnë kriter të prokurimit, procesi anulohet komplet! D.m.th nuk është komisioni ai që e matë peshën e dokumentit, në çoftëse

ka pasë inxhinier mungesë, është dashur të eliminohet procedura dhe të rishpallet nga fillimi. Te çështja e vonesave dhe te bërrja e zotimeve të mjeteve pas pranimit të faturës, po e them publikisht se ky rekomandim do të të përsëritet vazhdimisht përdërisa komuna ka obligime kontraktuale. Kur vetëvetiu kryhen punët pa mbulueshmëri financiare, operatori ta bie faturën dhe kur të dalin mjetet ia bën pagesën, është cikël që do të përsëritet. Një çështje tjetër që më la përshtypje dhe besoj që si kryetar komune duhet të merresh, është kontrata e hartimit të projekteve (e gjetura, A4). Është e ndarë në 7 kategori, secila e ka peshën e vet në bazë të çmimit. Te pjesa: Projektimi i urave, mbikalimeve, trotuareve etj... pesha e kontratës ka qenë 10%, d.m.th. vetëm 10% e vlerës së kontratës për ura, mbikalime, trotuare. Çmimi për këtë lloj projektim është 3.08€, prej dallim prej tjerëve që më i larti është 1.73€. Rreth 1.45€ më shtrenjtë sesa çmimi i dytë. Në vend se të përdoren 10% të shpenzimeve për këtë projektim, janë përdorur 61% të mjeteve për këtë pozicion të projektimit. Kjo nënkupton që nëse do të bëhej përshkrimi në fillim, ndoshta operatori tjetër do të dilte më i lirë sesa më i liri, sepse kjo e ka mundur vetëm që ndërimi i pozicioneve ta mundësojë përfitimin më të madh të operatorit që e ka pasur kontratën për projektim. Konsultoj një inxhinier dhe një ekonomist sepse kjo e ka dëmtuar direkt kontratën, sepse nuk kanë guxuar më shumë se 10% ose 35.000€ të bëjnë projekte, e në realitet janë bërë 212.000€. E kam bindjen e plotë që ky operator ka mundur të jetë me çmim më të lartë sesa operatori më i lirë. Janë të gjetura “me kunj”, raporti është i pamodifikuar, e në anën tjetër brenda ka gjëra që nuk do të kisha qejf asnjëherë t’i lexoja.

Kryetari – Jemi duke i adresuar të gjeturat me Zyrën e Prokurimit dhe USAID-in (që është partner). Ligji i prokurimit e thotë që operatori që është i përgjegjshëm me dokumentacion dhe gjithashtu më i liri, e fiton të drejtën. Çështja e akuzës ndaj zyrtarëve, askënd nuk e akuzova, por fatkeqësisht kryetari e ka për detyrë të kërkojë llogari prej komisionit të vlerësimit. Burim, nuk është e vertetë që pamja e jashtme është e mirë, ndërsa brendia është me “kunja”. Realisht ka shkelje, por jo deri në atë masë që e dëmtojnë integritetin dhe dinjitetin e komunës. Në Raportet e shumicës së ministrive dhe disa komunave, ka situatë vertetë më problematike dhe në krahasim me të gjitha këto, raporti ynë mund të qëndrojë si më i miri.

Lirigzon Kastrati – Faleminderit kryesues! Dëshiroj që para qytetarëve të komunës të shpreh shqetësimin në lidhje me gjetjet e ZKA-së, që kryesisht lidhen me parregullsitë në menaxhimin e punëve komunale. Problematikat që janë hasur mund të mos jenë shumë të rëndësishme, por vend për diskutim ka çdo herë. Unë edhe vitin e kaluar kam diskutuar për Raportin e Auditimit 2021, raport ky që nuk ka qenë i mirë. Kryetari nuk i ka pritur mirë këshillat, por uroj që përmirësime të ketë vazhdimisht. Fillimisht Raporti flet për parregullsitë në Prokurimin Publik, ku komuna vazhdimisht i shkelë dispozitat ligjore dhe aktet nënligjore në fushën e prokurimit, duke iu mundur operatorëve ekonomik që të paguajnë sigurinë e ekzekutimit të kontratës në afat më të shkurtër sesa që parashihet. Rastin e kemi te projekti i ndërtimit të Sheshit Qëndror, një projekt shumë i rëndësishëm me vlerë të madhe, në këtë rast në vend të garancionit që i jepet për 3 vjet, komuna ia mundëson për 1 vit. Poashtu, komuna duke e ditur që për disa projekte nuk ka mjete buxhetore, nuk e bën zotimin e mjeteve dhe e fut komunën në borxhe duke krijuar shpenzime shtesë në dëm të buxhetit. Parregullsitë janë hasur edhe te ndërtimi i rrugës në Rahovec, nga rrotullimi deri në dalje të Rahovecit në vlerë prej 1.222.000€, ku është mundur dhënia e tenderit për një kompani pa staf të duhur profesional. Raporti i ZKA-së si problematikë i përmend edhe pagesat që bëhen edhe në procedurën e përmbarrimit nga vendimet gjyqësore. Kjo është shqetësuese sepse është fakt që zbatimi i kontratës kolektive deri më 22.11.2022 për komunën tonë është i obligueshëm dhe mendoj që komuna duhet të gjejë një zgjidhje që t’i shmangët këtyre pagesave enorme që e ngarkojnë buxhetin e komunës. Në këtë drejtim kërkoj nga kryetari i komunës në bashkëpunim me avokaturën komunale, t’i shfrytëzojë mundësitë ligjore që t’i shmangen pagesave të kamatës dhe shpenzimeve të procedurës sepse informatave që kam, gjykatat janë duke vendosur në shumicën e rasteve pa seancë gjyqësore. Problemi tjetër që përballët komuna është te vonesat në pagesa të obligimeve financiare, kjo ndodh sepse komuna hyn në projekte pa pasur buxhet. Papërgjegjësi komunale është edhe garancioni i punimeve në afat jo të duhur, ku rreth 4 kontrata publike janë dhënë në garancion një vjeçar, ndërsa është dashur të jepen për dy vjet.

Kryetari – Ato që i biseduam, besoni që ne jemi pajtuar me të gjeturat dhe jemi pajtuar me faktin që ka nevojë të harlohet një Plan i Veprimit për zbatimin e rekomandimeve dhe një grup punues. E thatë që këshillat nuk i marrim parasysht, pikërisht e falënderova kuvendin që falë kritikave këtu e kemi rritur angazhimin dhe përkushtimin tonë dhe për këtë arsye kemi pasur progres. Deri në fund të vitin, mendojmë që 80% të rekomandimeve do të zbatohen dhe jemi në hap të mirë, të sugurt dhe mundësi e artë për të fituar grant nga granti i performancës.

Sejfullah Sejfullahu – E kam lexuar Raportin dhe e kam krahasuar me atë të vitit të kaluar dhe shihet që është kontrast. Bile, nuk e di sa ju kujtohet, vitin e kaluar pata propozuar edhe ta padisim Auditorin. Vlora Spanca sepse sipas jush ajo e ka bërë Raportin në mënyrë të padrejtë. Raporti është i mirë dhe kemi mundësi t'i fitojmë shumë lehtë 2 milion të grantit, nëse nuk i fitojmë, del që edhe këto gjetjet e vogla ka mundësi të na shkaktojnë probleme.

Kryetari – Unë i dhash opinionet që në fillim, duke thënë që kemi gjetje por edhe vlerësime pozitive. Ne e kemi fituar të drejtën për grant dhe kriteret e bazuar në ligj, sepse fjalia bazë që e vlerëson është që e kemi opinionin e pamodifikuar i pasqyrave vjetore financiare për Komunën e Rahovecit për vitin 2022. Vitin e kaluar, Vlora Spancën e kam takuar zyrtarisht dhe sot e kësaj dite mendojmë që n'a është bërë e padrejtë.

Hasan Përboqi – Faleminderit kryesues! Në emër të grupit e uroj ekzekutivin komunal për opinionin e pamodifikuar në Raportin Financiar të ZKA-së, poashtu e uroj edhe grupin punues që është marrë me adresimin e rekomandimeve dhe punën e bërë për vitin 2022. Ky raport paraqet gjendjen reale të Komunës së Rahovecit, veçanërisht në pjesën e pasqyrave financiare dhe janë në përputhje të plotë me standardet ndërkombëtare. Po ndalem tek një pjesë shumë e rëndësishme që ka të bëjë me shpenzimin e buxhetit, tashmë është bërë traditë, në qeverisjen e kryetarit, Latifi, buxheti shpenzohet 95%. Pjesa tjetër ka të bëjë me progresin e zbatimit të rekomandimeve nga viti i kaluar, nga 14 sa kanë qenë në vitin 2021, 9 prej tyre janë zbatuar plotësisht. E kuptojmë që ka vend ende për përmirësim, në mënyrë që në raportet për vitet e ardhshme komuna jonë të jetë sa më mirë. Përkundër asaj që këtë vit raporti është i pamodifikuar, kërkoj një çasje edhe më serioze, në mënyrë që raporti për vitin 2023 të ketë sa më pak të gjetura.

Defrim Kafexhiu – Faleminderit kryesues! Meqenëse kemi një çasje me joseriozitet të theksuar të grupit të Aleancës, ku me një volum të rendit të ditës me 19 pika, nuk e shohin të arsyeshme të qëndrojnë në sallë, përkundër asaj që kjo seancë paguhet nga buxheti i komunës. Teksa për qështje të padobishme sikurse shkarkimi i kryesuesit, marrim pjesë të gjithë, atëherë ne si grup i LVV-së nuk e shohim të arsyeshme të qëndrojmë deri në fund të kësaj seance dhe po e lirojmë sallën shkaku i papërgjegjësisë të grupit të Aleancës.

Hasan Përboqi – Detyrohem t'i përgjigjem ish kryesuesit si shef i grupit të Aleancës, e para, këtu jemi të gjithë të barabartë. Një porosi për grupin e LVV-së, që për shtigje të gjata nuk jeni!

14. Shqyrtimi i Raportit nga Drejtoria e Arsimit rreth përfundimit të vitit mësimor 2022/2023;

Avni Morina – Faleminderit kryesues! Të nderuar anëtarë të kuvendit, të gjithë të pranishëm. Në këtë raport janë të pasqyruara të gjitha aktivitetet që kanë të bëjnë me procesin edukativo-arsimor në komunën tonë, prej fillimit të vitit mësimor deri më 30 qershor të këtij viti. Viti shkollor ende nuk ka përfunduar sepse zakonisht përfundon me 31 gusht. Jemi munduar që të pasqyrojmë të gjitha aktivitetet zhvillimet, garat, rezultatet, projektet dhe sfidat që i kemi pasur që në fillim të vitit shkollor, duke përfshirë këtu edhe grevën në arsim, e cila shkaktoi një muaj të plotë mosmbajtje të mësimit. Nga testi i maturës që kanë marrë pjesë 408 maturantë, kanë kaluar 238 prej tyre dhe nuk kanë kaluar 170. Këta të fundit do t'i nënshtrohen afatit të dytë me 26 gusht. Raporti me të gjitha të dhënat i ka gjithsej 6 faqe material.

Burim Krasniqi – Fillimisht dua t'i jap vërejtje grupit të asambleistëve të Aleancës, është papërgjegjësi totale në raport me drejtorat e subjektit të vet politik, të cilët kanë pritur prej orës 10:00 të mëngjesit deri tani. Në çoftëse vazhdohet me këtë papërgjegjësi, LDK, nuk do të qëndrojë më që ta sigurojë kuorumin. Është mirë që së paku 80% e secilës parti të jenë prezentë, për t'i dhënë kuptim asamblesë komunale. Te raporti, të lutem, të na përcjellësh me statistika: Sa nxënës, sa është nota mesatare, mungesa e nxënësve, mungesat e arsimtarëve-profesorëve etj... që ndoshta mund të kemi ndonjë sugjerim që mund të ketë ndikim në të mirë të DKA-së dhe komunës në funksionim të arsimit në Komunën e Rahovecit.

Hasan Përboqi – Ne fakt e kam një sqarim për shefin e grupit të asambleistëve të LDK-së, momentalisht prej 15 asambleistëve, AAK i ka 10 të pranishëm. Përgjegjësi para qytetarëve kemi të gjithë njëjtë. E mirëkuptojmë çdo njërin, por nuk mund t'i keshi nën menaxhim si gjashtë, si pesëmbëdhjetë. E falenderoj çdo anëtarë që ka qëndruar deri në këtë kohë dhe gjithashtu duhet të respektohet besimi që e kemi marrë prej qytetarëve.

Lirigzon Kastrati – Faleminderit kryesues! Kisha kërkuar prej teje ta respektosh rregulloren dhe radhën e përfaqësimit të diskutimeve. Nga drejtori i Arsimit, dëshiroj të na tregojë se cilat synime i ka arritur, a kanë përfundur tri qerdhjet publike elektrike, nëse jo, pse? A është investuar në efikasitet të energjisë në objektet shkollore, nëse jo, pse? Cilat janë veprimet e ndërmarra në përmirësimin e performancës së sistemit arsimor në komunën tonë? Si janë menaxhuar shkollat? Mungesat e nxënësve dhe mësimitdhënësve?...

15. Shqyrtimi i Informatës nga Drejtoria e Bujqësisë, Pylltarisë dhe Zhvillimit Rural;

Berat Duraku – Faleminderit kryesues! Përhëndetje për kryetarin, kolegët, asambleistët. Para jush e kemi edhe materialin e informatës për aktivitetet që kanë ndodhur në drejtorinë e Bujqësisë në periudhën janar-qershor. Me plan të punës është kërkuar që në informatë të ketë kryesisht të dhëna për aplikimin e fermerëve tanë për subvencione, por ne jemi zgjeruar duke paraqitur edhe informata të ndryshe për aktivitetet kryesore. Këtë vit fat i keq ka qenë që kushtet klimatike nuk kanë qenë në favor të fermerëve dhe si rezultat i kësaj kemi dëme të konsiderueshme nga lagështia e tepërt. Sektori i lavërtarisë ka rritje të sipërfaqes dhe kjo ka ndikuar në rritjen e subvencione në kulturën e grurit, kur i kemi edhe 707ha më shumë. Te kultura e specit, si pasoj e kushteve klimatike, krahasuar me vitin e kaluar këtë vit 68 ha i kemi më pak. 5.7 milion është vlera e subvencioneve që do ta përfitojnë fermerët e Komunës së Rahovecit, 270.000€ më shumë sesa vitin e kaluar.

Lirigzon Kastrati – Po ndërlidhem me çështjen e vërshimeve dhe dëmeve në bujqësi. Para disa jave komuna i ka njoftuar qytetarët për vlerësimet e bëra nga breshëri për vreshtat. Kur do të kompenzohen këto mjete dhe a janë dorëzuar listat për raportim në Ministri?

Burim Krasniqi – Më ka lënë përshtypje se të gjitha shënimet janë bazë të aplikacioneve për subvencione. Besoj që Drejtoria e Bujqësisë duhet t'i bëjë edhe matjet dhe konstatimet dhe analizat e veta.

Sejfullah Sejfullahu – Nuk dua të flas shumë për raportin, dua ta shfytëzoj rastin për një apel dhe t'i ftoj të gjithë asambleistët e që këta ta përdorin ndikimin e tyre që me 5-6 gusht në Krushë të Madhe organizohet "Agro-Festa" dhe janë të ftuar në Krushë të Madhe, pozitë dhe opozitë.

Berat Duraku – Po Lirigzon, me 16 qershor e kemi formuar komisionin dhe duke u bazuar në udhëzimin administrativ e kemi hap edhe njoftimin duke i ftuar fermerët t'i bëjnë kërkesat për vlerësimin e dëmeve. Deri më tani i kemi pranuar 360 kërkesa dhe në dy javët e para të muajit gusht, raporti do të dorëzohet në Ministri. Burim, Drejtori e Bujqësisë ka data bazë të të dhënave pothuajse për secilin fermer, por të dhënat e kultivimit ndërrojnë nga viti në vit.

16. Shqyrtimi i Informatës nga Drejtoria për Shëndetësi dhe Përkujdesje Sociale;

Kryetari – Për dallim nga Raporti i Arsimit, Raporti i Shëndetësisë ka bukur shumë statistika. Gjatë periudhës janar – qershor 2023 janë kryer gjithsej 55.117 shërbime. Është shtuar numri i punëtorëve shëndetësorë. Ka filluar renovimi i jashtëm i QKMF-së. I kemi blerë edhe dy autoambulanca tjera për nevojat e QKMF-së, njëra shkon në Krushë dhe tjetra në qytet. Falë vizitave shtëpiake për nena dhe fëmijë, është afitur një grant nga UNICEF-i, një veturë të re për nevojat e QKMF-së. Nga muaji maj është funksionalizuar Qendrën e Mjekësisë Familjare edhe të dielëve, me orar 07:00-21:00.

17. Shqyrtimi i Informatës mbi realizimin e Planit për Mirëmbajtjen e Hapësirave të Hapura Publike në Komunën e Rahovecit;

Përparim Krasniqi – Faleminderit kryesues! Përhëndetje për të gjithë anëtarët e kuvendit. Në raport kemi shfaqur statistika dhe përveç kësaj ju informoj zyrtarisht që i kemi tri kontrata për mirëmbajtjen e hapësirave publike duke përfshirë edhe lapidaret, varrezat e dëshmorëve dhe varrezat civile në të gjithë territorin e Komunës së Rahovecit.

Lirigzon Kastrati – Te çështja e mirembajtjes së varrezave, në fshatin Hoçë e Vogel janë pastruar, por një pjesë jo dhe thash ta rikujtoj.

Burim Krasniqi – E kam një pyetje interesante, varrezat në zonën urbane (99.921.5m²), po më intereson këtë .05 m² me çka e mate? vetëm që raporti të jetë më bindës apo si?

Përparim Krasniqi – Matjet janë të bëra nga DEMOS-i në bashkëpunim me Komunën e Rahovecit. Statistikat janë të sakta, nuk janë të shpikura. Te Lirigzoni, rreth pjesës të varrezat që nuk është pastruar, sepse për momentin aty nuk ka varreza dhe kompania nuk e ka parë të nevojshme të pastrohet.

18. Shqyrtimi i Informatës mbi realizimin e Planit të punës së Zyrës së Prokurimit, janar – qershor 2023;

Astrit Mullabazi – Faleminderit kryesues! Gjatë periudhës raportuese gjashtë mujore të punës së Zyrës së Prokurimit, ju njoftojmë se deri tani kemi proceduar 45 aktivitete të prokurimit me vlerë të parashikuar 11.642.286.02€. Janë nënshkruar 24 kontrata me vlerë 1.102.000€. Një aktivitet është në procedurë të ankesës dhe është ritenderuar, bëhet fjalë për mbikëqyrjen e investimeve kapitale, ndërsa 20 aktivitete tjera janë në procedura të prokurimit në vlerësim. Një sqarim rreth raportit të ZKA-së, sa i përket vlerësimit joadekuat në kuadër të Zyrës së Prokurimit, mund ta verifikoni edhe në web-faqen e Komunës së Rahovecit, që në dosjen e tenderit të një procedure të prokurimit është kërkuar vetëm Plani i Menaxhimit të Trafikut i përgatitur nga inxhinieri i komunikacionit. Në dosjen e tenderit nuk është kërkuar as diploma e inxhinierit të komunikacionit e as cv-ja. Sqarimi tjetër është që kemi kërkuar ISO-standarte nga kompanitë dhe procedurat e prokurimit janë zhvilluar konform ligjit të prokurimit publik.

Burim Krasniqi – I kam dy çështje: Vlera e parashikuar e aktiviteteve, vlera prej 11.642.286.02€ a është për këto aktivitete apo për tërë vitin? Nëse është e paraparë vetëm për këtu 24 aktivitete dhe komplet kontratat janë 4.357.000€, atëherë vlera e planifikuar është 60% më e madhe sesa vlera e kontratave të lira, d.m.th një huqje e madhe. E dyta, keni mospërputhje në raportim, raporti financiar dhe informata juaj. Sipas raportit financiar, planifikimi është 11 milion e 840 mijë € dhe sipas jush 11 milion e 650 mijë € (dallimi është rreth 200.000€). Tjetër, kontratat e lidhura sipas raportit të financave është 2.2 milion, sipas jush është 4.3 milion (dallimi mbi 2 milion).

Astrit Mullabazi – Për 45 aktivitete të prokurimit me urdhëresë të kryetarit të komunës e kapin vlerën e paraparë 11 milion e 642 mijë €, prej këtyre janë nënshkruar vetëm 24 kontrata me vlerë 1 milion e 102 mijë €, kurse 21 aktivitete të prokurimit brenda kësaj vlere nuk janë të nënshkruara kontratat. Njëra prej tyre është në procedurë të vlerësimit, ndërtimi i qendrës rinore dhe kulturore me vlerë 3.5 milion €. Sa i përket urdhërblertjes, këtë informatë e kemi nga sistemi i freebalances, ku deri më tani Zyra e Prokurimit ka proceduar 758 pagesa me vlerë 4.357.112.66€.

19. Shqyrtimi i Raportit 6 mujor të Këshillit të fshatit Hoçë e Madhe.

Senad Mullaavda – Përshëndetje për kryetarin, kryesuesin, drejtorët dhe juve kuvendarë të nderuar! Para jush e keni Raportin 6 – mujor të punës të këshillit të fshatit Hoçë e Madhe. Ky këshill mbledhjet i mbanë në bazë Planit të Punës i cili është miratuar në kuvend. gjithashtu në raport janë të paraqitura pikat e shqyrtuara dhe detajet tjera.

Kryesuesi – A kemi komente ose sugjerime në lidhje me këtë pikë?... Nëse jo, atëherë po e përmbyllim seancën e shtatë, duke iu falënderuar për qetësinë dhe maturinë, shihemi në seancat tjera.

Procesmbajtësi:


Albion Krasniqi

